

En in quart tschentaner semida bia

Ils Open Airs Lumnezia 1985 e 2009 han biaras parallelas e differenzas

DA SIMONA CAMINADA / ANR

■ **La fin d'jamna vargada ha igl Open Air Lumnezia festivau siu 25avel giubileum. Buca adina han ils concerts sut tschiel aviert denton giu liug a Degen e buca adina ha ei giu tons visitaders sco uonn. Ina cumparegliaziun denter igl emprem ed il 25avel Open Air Lumnezia.** Atgnamein ha tut entschiet cun bia sulegl e temperaturas migeivlas cura che la band indigena No Future ha «cantau en veta» il 25avel Open Air Lumnezia il venderdis vargau. Gia allas treis dil suentermeizdi ha la giuvna band da Glion saviu carmalar ina roscha fans avon la tribuna gronda a Degen.

Las caultschas cuortas ed ils t-shirts han denton spertamein stuiu far plaz a pelerinas, stivlas da gummi e parisols. Cura che Patent Ochsner da Berna ha dau siu concert entuorn las otg la sera ha ei entschiet a plover. Dils sis concerts dil venderdis ein treis vegni l'unfrenda dalla plievgia, tgei che ha denton buca fatg donn alla buna luna dils visitaders.

Pluviu haveva ei gia ils 6 da fenadur 1985 duront l'emprema ediziun digl Open Air Val Lumnezia, sco el veva aunc num da lezzas uras. Igl Open Air Val Lumnezia haveva lu giu liug a Vallada Nova sur Vattiz ed era vegnius organisau dalla Giuventetgna lumneziana, ina organizaziun da pliras uniuns da giuventetgna dalla Lumnezia.

Ch'il pli grond open air dil Grischun vegness oz aunc adina organisau d'ina niun da giuventetgna ei buca pli da s'imaginar. Oz stattan in comite d'organizaziun cun personas specialisadas davos igl Open Air Lumnezia.

Las Liricas Anlas fan saltar il publicum

Dallas 13 bands che han sunau la fin d'jamna vargada al 25avel Open Air Lumnezia a Degen era ina dalla Spagna, tut tschellas dalla Svizra e dalla Tiaratudestga. 1985 haveva ei dau sulettamein musica svizra. Tier ils musicists digl emprem Open Air Val Lumnezia s'uodevan per exempel *Alexi Nay* e *Marcus Hobi* e la band da rock da Mustér Hades. Ils texts da lur canzuns saveva il publicum ordadora.

Era uonn ha il publicum saviu cantar ordadora ils texts, denton buca quels da Hades, mobein quels dalla Liricas Anlas. La furmazion da hip hop dalla Cadi ha dau siu concert la sonda allas sis. E per l'emprema gada quei di han las Liricas dumignau quei, che mo aunc duas ulteriuras bands, numnadamein Culcha Candela e Stress, han dumignau suenter - d'animar ils visitaders da saltar e da cantar duront igl entir concert.

Pialgaglina deva ei gia 1985

Ch'igl Open Air Lumnezia s'auda tier ils impurtonts open airs en Svizra han buca mo las bands da renum mussau, mobein era la preschientscha dalla Televisiun Svizra sigl areal. Divers concerts ein vegni registrati per mussar els pli tard ell'emissiun da musica «Musicnight» sin SF2.

Tier in open air s'auda aschia ni aschia bia tecnica. Per ch'ins auda era la musica sil plaz da campar che sesanfla in tec ordeifer il areal da concert, ston ils musicists mintgamai far igl aschinumnu «soundcheck». Quel possibilitescha al tecnicer da mischedar la musica aschia,

che quella tuna bein e ch'ins auda avunda dad ault las vuschs dils cantadurs. 1985 haveva ei era gia dau «soundchecks» e lu havevan oravontut las vuschs dalla duas cantaduras dalla gruppa Bluesfingers fatg pialgaglina als visitaders – pia gia avon l'entschatta dil concert.

Era uonn ha ina vusch procurau per pialgaglina, quella dalla cantadura Karolyn che ha concertau ensemen cul davos «highlight» dalla sonda sera, numnadamein cun Stress. Il renomau musicist da hip hop dalla Romandia ha demonstrau sin moda impressiunointra ch'el ei in dils «top acts» ella scena da musica dalla Svizra. Da 700 sin 13 500 visitaders

Igl 25avel Open Air Lumnezia ha carmalau questa fin d'jamna 13'500 visitaders en Val Lumnezia. Ils concerts dil venderdis e dalla sonda ein stai vendi ora. 1985 havevan «mo» 700 personas visitau ils concerts digl emprem Open Air Val Lumnezia che haveva lu cuzzau mo in di. Era puncto finanzas dat ei grondas differenzas: 1985 haveva igl entir open air custau rodund 11 000 francs. Oz tunschess quella summa sulettamein per cuvierer ils cuosts dad ina band enconuschenta, denton maina per ina band fetg renomada.

Il preventiv per igl open air da giubileum munta a rodund 1,3 milliuns francs sco *Claudine Cavegn* dil comite d'organizaziun ha detg sin damonda. In ulteriur exempel per il grond svilup ch'igl Open Air Lumnezia ha fatg enteifer in quart tschentaner.

Ulteriuras fotografias sut:
www.suedostschweiz.ch (Fotogalerie)



La band No Future da Glion cul cantatur Samuel Schmid ha fatg l'entschatta dil 25avel Open Air Lumnezia.



Per vegnir sigl areal d'open air han ils visitaders stuiu star en colonna avon la cassa.